

Ni Presidente Dieter F. Uchtdorf

Maikadua a Mammagbaga
iti Umuna a Panguluen



Punnuenyo ti Lubong iti Ayat ni Cristo

No panunotentayo ti maipapan ti Paskua, masansan a panunotentayo ti maipapan ti pannangted ken panangawat kadagiti regalo wenno sagut. Dagiti sagut ket mabalin a paset ti ik-ikkan pateg a tradision, ngem makaikkatda pay iti simple a kinangayed ti panawen ti Paskua ken makasingada kadayo iti panangrambak iti pannakayanak ti Mangisalakantayo iti napnuan kaipapanan a wagas.

Ammok iti bukodko a padas a dagiti nakallalagip unay a Paskua ket mabalin a dagiti kanunumuan unay a padas. Awan duadua a nanumo wenno saan a nangina dagiti sagut a naawatko idi ubingak no maidasig kadagiti pagrükodan iti agdama. No dadduma makaawatak idi iti nasursiran wenno natakupan a t-shirt wenno sangaparis a guantes wenno medias. Malagipko ti maysa a naisangsangayan a Paskua idi inikkannak ni manongko iti maysa nga immuko a naaramid iti kayo a kinitikitanna.

Saan a masapul dagiti nangina a regalo wenno sagut tapno aramidentayo a napnuan kaipapanan ti Paskua. Malagipko maipapan ti maysa nga estoria nga insarita ni Elder Glen L. Rudd, a nagserbi kas maysa a miembro ti Pitupulo manipud idi 1987 agingga idi 1992. Maysa nga aldaw sakbay ti aldaw ti Paskua adun a tawen ti napalabas, idi isu ti mangimatmaton iti bishops' storehouse, naammuanna manipud iti lider ti simbaan maipapan iti maysa nga agkasapulan a pamilia a kaak-akar laeng iti ciudad. Idi simmarungkar isuna iti bassit a pagtaenganda, natakuatanna ti

ubing pay nga awan asawana nga ina nga addaan iti uppat nga annak nga agtawen iti nababbaba ngem 10.

Adu dagiti kasapulan ti pamilia gapu ta ti ina ket saan a makagatang kadagiti pangsagana a taraon wenno regalo para kadagiti annakna iti dayta a Paskua—dina kabaelan ti gumatang iti uray koma man laeng maysa a Christmas tree. Kinasarita ni Brother Rudd ti pamilia ket naammuanna a paggugusto dagiti tallo a babassit nga ubbing a babbai ti maysa a munieka wenno stuffed animal. Idi saludsodenna ti innem-ti-tawenna nga anak a lalaki no ania ti kayatna, insungbat ti mabisin a nga ubing a lalaki, “Kayatko koma ti sangamalukong nga oatmeal.”

Inkari ni Brother Rudd iti ubing a lalaki nga itugotanna iti oatmeal ken ti mabalin nga ited pay. Kalpasanna napan isuna iti bishops' storehouse ket nangala iti taraon ken dadduma pay a kasapulan nga abasto tapno maited ti madagdagus a kasapulan ti pamilia.

Iti dayta met la a bigat maysa a managparabur a Santo iti Ud-udina nga Aldaw ti nangted kenkuana iti 50 doliarez “para iti maysa nga agkasapulan.” Tapno mausar dayta nga abuloy, intugot ni Brother Rudd ti tallo nga annakna a napan naggatang kadagiti regalo iti Paskua—dagiti annakna ti nagpili kadagiti ay-ayam para kadagiti agkasapulan nga ubbing.

Kalpasan iti panagiluganda kadagiti taraon, luplupot, regalo, Christmas tree, ken sumagmamano a dekorasion, nagmaneho ti pamilia a Rudd a napan iti pagtaengan ti

pamilya. Idiay a tinulonganda ti ina ken dagiti annakna a nangurnos iti Christmas tree. Kalpasanna inkabilda dagiti regalo iti sirok ti Christmas tree ken insagutanda ti ubing a lalaki iti dakkel a sangabungon nga oatmeal.

Nakasangit ti ina, naragsakan dagiti ubbing, ket nagkantada amin iti kansion iti Paskua. Iti dayta a rabii bayat ti panagguummong ti pamilya a Rudd para iti pangrabii, nagyamanda gapu ta nakaisangbayda iti sumagmamano a ragsak ti Paskua iti maysa a pamilya ken nakatulogda iti bassit nga ubing a lalaki nga umawat iti sangamalukong nga oatmeal.¹

Ni Cristo ken ti Kaipapanan ti Pannangted

Panunotenyo maipapan dagiti simple ngem nangayed a wagas a pinili ti Nailangitan nga Amatayo a pangdaydayaw iti pannakayanak ti Anakna. Iti dayta nasantuan a rabii, nagparang dagiti anghel saan a kadagiti nabaknang no di ketdi kadagiti agpaspastor. Nayanak ni ubing a Cristo saan nga iti maysa a mansion no di ketdi iti maysa a kulluong. Isu ket nabungon iti saan a seda a lupot no di ketdi iti lamping.

Ti kinasimple dayta nga umuna a Paskua ket naisakbay a nangyanninaw iti biag ti Mangisalakan. Uray no Isu ti nangparsua iti daga, nagnaed iti pagarian ti kinangayed ken dayag, ken nagtakder iti makanawan nga ima ti Ama, immay Isuna ditoy daga a kas maysa a nga awan gawayna nga ubing. Ti biagna ket maysa a pagwadan ti napakumbaba a kinatakng, ken tinulonganna dagiti nakurapay, dagiti masaksakit, dagiti agladladingit, ken dagiti nadagsen ti im-imetanda.

Nupay Isu ket maysa nga Ari, saanna nga inkankano ti ania man a pakaidayawan wenno dagiti kinabaknang ti tao. Ti biagna, dagiti balikasna, ken dagiti inaldaw nga aramidna ket makaawis a pagwadan ti gagangay ngem napnuan kaipapanan a kinangayed.

Ni Jesus a Cristo, a naan-anay a makaammo no kasano ti mangted, impakitana kadayaw ti pagtuladan ti pannangted. Kadagiti makarikna unay iti nalaus a panagliday ken panagladingit, Isu ti manangngaasi ken mangliwliwa kadakayo. Kadagiti addaan iti sagabaen iti bagi ken panunot, Isu iti mangisangbay iti ayat ken pannakapaimbagyo. Kadagiti addaan iti nadagsen a basol, Isu ti mangted iti namnama, pammakawan ken pannakasabbotyo.

No kaduatayo koma ti Mangisalakan ita, masarakan-tayo Isuna no sadino ti kanayon a yanna— nga agserserbi

kadagiti napakumbaba, kadagiti agladladingit, kadagiti nanumo, kadagiti agtutuok, ken kadagiti agrigrigat iti kaungganda. Iti daytoy a panawen ti Paskua ken iti kanayon, makaitedtay koma Kenkuana babaen ti panagayattayo kadagiti dadduma a kas iti panagayatna. Malagiptayo koma ti nanumo a kinangayed ti pannakayanakna, dagiti sagutna (kas iti pammakawan, pannubbot, ken dadduma pay), ken ti biagna. Ken, babaen dagiti simple nga aramid ti kinasayaat, panangngaasi, ken pannakipagrikna, mabalintay koma a punnuen ti lubong iti lawag ti ayat ken pannakabalinna a mangpaimbag.

NAGADAWAN

1. Kitaen iti Glen L. Rudd, *Pure Religion: The Story of Church Welfare since 1930* (1995), 352–53; kitaen met iti Glen L. Rudd, “A Bowl of Oatmeal,” *Church News*, Dis. 2, 2006, 16.

PANANGISURO MANIPUD ITI DAYTOY A MENSAHE

Isuro ni President Uchtdorf a nasken a surotentayo ti pagwadan ti panangibinglay ti Mangisalakan. Kiddawenyo kadagiti tao a sarungkaranyo nga agsisinnublat iti panangibagada iti maysa a sagut nga inteden ti Mangisalakan kadakuada, ket paglilinnawagan no kasano a mausarda dayta a sagut iti panagserbi iti dadduma. Kas pagarigan, no naparaburan ti maysa a miembro iti paglaingan nga agkansion wenno agkanta, mabalinna ti mapan agkaroling iti sumagmamano kadagiti kaarubada. Mabalinyo ti mangted iti kararag kadagiti sarungkaranyo, nga agdawdawat iti Dios iti pammaregta no ania dagiti sagut a mabalin nga ibinglay kadakuada, ken no asino ti pangibinglayanda. Surnadanyo ti aniaman a pammaregta nga awatenyo.

AGTUTUBO

Agkursuro manipud iti Padas dagiti Dadduma

|sarita ni President Uchtdorf manipud iti bukodna a padas idi isurona a “dagiti nakalalagip a Paskua ket mabalin a dagiti kanunumuan unay a padas.” Adu ti masursurotayo manipud kadagiti in-inauna kadayaw; adu a nataengan ti nagbiag kadagiti panawen ti gubat, awanan pagsapuluan wenno pangtrabahuan, panagsakit, wenno dadduma pay a pannubok. Saludsoden dagiti nataengan a miembro ti ward wenno branchyo

a mangisarita maipapan ti kapatgan ken kalalagipan unay a Paskuada. Mabalimo nga isurat dagiti estoriada. Padasenyo ti agsursuro manipud kadagiti pagwanda babaen ti panangipamaysa nga ad-adda pay iti daytoy a Paskua maipapan ti pannangted iti naimpuosan a serbisio ken pananglaglagip iti Mangisalakán.

ANNAK

Dagiti Sagut manipud ken Jesucristo

Sumagmamano a tao ti mangusar iti Christmas tree a pangrampak iti pannakayanak ni Jesucristo. No dadduma ikabil dagiti tao dagiti regaloda para kadagiti dadduma iti sirok ti Christmas tree. Ania dagiti sagut nga inted ti Mangisalakán kadakayo? Idrowing ti bukodyo a Christmas tree nga adda lima a regalo iti sirokna. Basaenyo ti nasantuan a kasuratan iti baba ket koloran ti ladawan ti regalo a mangikonekta iti tunggal nasantuan a kasuratan. Mabalinyo ti mangted kadagiti regalo ken ni Jesucristo babaen iti panagsapul kadagiti wagas a makatulong iti dadduma.

Dagiti Salmo 33:6

Juan 14:27

Juan 15:9

2 Nephi 2:8

3 Nephi 15:9

© 2014 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/14. Pannakaanamongna a maipatarus: 6/14. Pannakaipatarus ti *First Presidency Message, December 2014*. Ilokano. 10872 864



Pammati • Pamilia • Tulong

Ti Nadiosan a Mision ni Jesucristo Prinsipe ti Kappia

Nainkararagan nga adalenyo daytoy a material ken kalikagumanyo nga ammuen no ania ti ibinglay. Kasano a ti pannakaawat iti biag ken mision ti Mangisalakan ket mangpapijsa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Daytoy ti paset ti maysa a serye dagiti Mensahe iti Visiting Teaching a mangitampok kadagiti aspeto ti mision ti Mangisalakan.

"Ti Mangisalakan ti pagtaudan ti pudno a talna," kinuna ni Elder Quentin L. Cook ti Korum dagiti Sangapulo-ket-dua nga Apostol. "Uray kadagiti pannubok ti biag, gapu iti Pannubbot ti Mangisalakan ken ti paraburna, ti nalinteg a panagbiag ket magunggonaan iti bukod a talna."¹ Ti pannakaawat a ni Jesucristo ti Prinsipe ti Kappia ket makatulong kadatayo a mangsapul iti talna iti kaunggantayo ken mangnayanon iti pammatitayo Kenkuana.

Kinuna ni Jesucristo: "Dagitoy insaok idi kadakayo, tapno adda koma talnayo kaniak. Ditoy lubong addanto rigatyoy: ngem mananginanamakayo; siak pinarmekko ti lubong" (Juan 16:33). Iti panangiburayna iti pammaneknek iti dayta a kinapudno, Linda S. Reeves, maikadua a mammagbaga iti sapa sapanguluen ti Relief Society, kinunana: "Nagbalin a manangngaasi unay ti Apo kaniak ken tinulongan a mapalagan dagiti imetko.

Tinulongannak a makarikna iti naindaklan a talna."²

Elder Richard G. Scott ti Korum dagiti Sangapulo-ket-dua nga Apostol insurona: "Ti pagulidanan a lugar a . . . pakariknaantayo iti talna ket iti mismo nga uneg dagiti bukodtayo a pagtaengan, lugar a nagaramidantayo iti amin a kabaellantayo tapno mapagbalintayo a ni Apo Jesucristo ti umuna nga ipangpangrunatayo."³

Dagiti Mainayon a Nasantuan a Kasuratan

Isaias 9:6; Lucas 2:14;
Juan 14:27; 1 Nephi 13:37;
Doktrina ken Katulagan 59:23

Manipud kadagiti Nasantuan a Kasuratan

Impadto ni Isaias maipapan iti pannakayanak ni Jesucristo, ti Prinsipe ti Kappia (kitaen iti Isaias 9:6). ka Kadagiti daga ti America, imbaga ni Samuel a Lamanite dagiti pagilasinan a buyogan ti pannakayanak ni Cristo kalpaskan ti lima a tawen (kitaen iti Helaman 14:3, 5). Kabayatan ti yaasideg ti naipadto nga aldaw,

impangta dagiti di mamatpati a papatayenda amin a Kristiano no saan a mapasamak dagitoy a pagilasinan. Ni propeta Nephi "sipapasnek nga immawag iti Apo iti nagmalem; ket adtoy nangngegna ti timek ti Apo, a kinunana: . . . Umayak iti kabigatanna iti lubong" (3 Nephi 1:12–13). Nagparang dagiti pagilasinan, ket iti pannakayanak ti Cristo, "nangrugi manen dagiti umili a maaddaan iti talna iti pagilian" (bersikulo 23).

Idiay Betlehem, ni Maria "impasngayna ti anakna nga inauna, ket binungonna ti lampin, ket impaiddana iti maysa a kulluong" (Lucas 2:7).

DAGITI NAGADAWAN

1. Quentin L. Cook, "Personal Peace: The Reward of Righteousness," *Liahona*, Mayo 2013, 35.
2. Linda S. Reeves, "Claim the Blessings of Your Covenants," *Liahona*, Nob. 2013, 120.
3. Richard G. Scott, "For Peace at Home," *Liahona*, Mayo 2013, 29.

Panunotenyo Daytoy

Iti ania a wagas a makaisangbay iti talna ti Mangisalakan iti biagyo?